

JANGAN PAGAR MAKAN PADI





UCAPAN YAB PERDANA MENTERI,
DATO HUSSEIN ONN, SELAKU
PRESIDEN UMNO, DI PERHIMPUNAN
AGUNG UMNO YANG KE-30, DI
NIRWANA BALLROOM, HOTEL HILTON,
KUALA LUMPUR, PADA HARI JUMAAT,
6HB. JULAI, 1979 – JAM 9.30 PAGI.

**ASSALAMUALAIKUM WARAHMATULLAHI
WABARAKATUH.**

Yang Berhormat Tuan Pengerusi Persidangan,

Yang Amat Berhormat Datuk Seri Dr. Mahathir
Mohamad, Timbalan Presiden,

Yang Berhormat Naib-naib Presiden,

Ketua-Ketua dan Wakil-wakil Parti Anggota Barisan
Nasional,

Ahli-Ahli Majlis Tertinggi UMNO,

Dif-dif yang kehormat.

Para Perwakilan dan Pemerhati sekalian.

BISMILLAH-HIRAHMAN-NIRAHIM

Alhamdulillah, bersyukur kita ke hadrat Allah Subhanahu Wataala yang telah melimpahkan rahmatNya serta mengurniakan izinNya, sehingga dapat kita semua berkumpul sekali lagi pada tahun ini bagi menjayakan Perhimpunan Agung UMNO Yang Ke-30. Semoga Allah memberi taufik dan hidayahNya kepada kita semua supaya dapat kita menunaikan tugas dan kewajipan kita dengan penuh ketabahan dan ketenangan di Perhimpunan Agung ini

Saya mengucapkan terima kasih serta penghargaan kepada ketua-ketua dan wakil-wakil parti anggota Barisan Nasional serta dif-dif yang lain di atas kesudian mereka hadir di majlis pembukaan ini. Kepada para perwakilan dan pemerhati, terutamanya mereka yang menghadiri Perhimpunan Agung ini buat pertama kalinya, saya bagi pihak ahli-ahli Majlis Tertinggi UMNO, mengalu-alukan kehadiran mereka.

Hari ini genaplah seratus hari peristiwa sedih dan pilu yang telah menimpa negara disebabkan kemangkatan secara mengejut Almarhum Tuanku Yahya Petra Ibni Almarhum Sultan Ibrahim. Bagi pihak ahli-ahli Majlis Tertinggi dan para perwakilan sekalian, saya merakamkan ucapan takziah yang tidak terhingga kepada Duli Yang Maha Mulia Tuanku Zainab dan Duli Yang Maha Mulia Sultan serta keluarga Diraja Kelantan di atas kemangkatan Almarhum itu.

Di samping itu marilah kita, sempena dengan Perhimpunan Agung ini, merakamkan juga setinggi-tinggi ucapan tahniah kepada Duli Yang Maha Mulia Seri Paduka Baginda Sultan Haji Ahmad Shah Al-Musta'in Billah Ibni Almarhum Sultan Abu Bakar Ri'ayatuddin Al-Mu'adzam Shah, di atas perlantikan Baginda sebagai Yang di-Pertuan Agong.

Persidangan juga mengucapkan setinggi-tinggi tahniah kepada ke bawah Duli Yang Maha Mulia Tuanku Jaafar Ibni Almarhum Tuanku Abdul Rahman di atas perlantikan Baginda sebagai Timbalan Yang di-Pertuan Agong.

PINDAAN

Perhimpunan kita kali ini amatlah penting. Pada petang ini dan hari esok, para perwakilan akan membahaskan ucapan dasar serta membincangkan usul-usul yang dibentangkan. Hari Ahad telah ditetapkan sebagai Perhimpunan Agung Khas bagi membahaskan beberapa pindaan kepada Perlembagaan UMNO. Oleh kerana pindaan-pindaan ini akan dikemuka dan dibincangkan dalam Perhimpunan Agung Khas, saya tidaklah hendak menyentuhnya dengan panjang lebar, sekadar untuk memaklumkan bahawa kajian kepada perlembagaan, seperti yang akan kita lakukan pada hari Ahad ini, perlu dibuat dari masa ke masa bagi memperkemas dan melicinkan lagi jentera pentadbiran parti.

Secara kebetulan juga, esok genaplah satu tahun parti kita menerima mandat baru dari rakyat untuk mentadbirkan negara dan memesatkan pelaksanaan pembangunan. Sebagai parti yang terbesar dan tertua dan yang sentiasa mendapat kepercayaan sebilangan besar orang-orang Melayu, UMNO mesti berupaya meneruskan usahanya supaya ia dapat meningkatkan kemakmuran dan kesejahteraan rakyat. Bagi membolehkan usaha ini dilaksanakan kita mestilah mengukuhkan lagi parti kita serta menggembelinkan tenaga dan kekuatan parti kita. Kekukuhan UMNO terletak pada sokongan rakyat yang diperolehinya, kegiatan-kegiatan yang dapat dijalankan, keadaan jentera partinya yang licin serta kualiti pemimpin-pemimpinnya.

Perpaduan dan cinta kepada tanahair dan bangsa serta semangat berani dan kesanggupan untuk menjaga dan

mempertahankan kepentingan-kepentingan rakyat dan hak asasi kita mestilah dikekalkan dan diperkukuhkan lagi. Keupayaan kita memperjuangkan perkara-perkara inilah yang akan menjadi ukuran sama ada rakyat akan terus memberikan kepercayaan dan sokongan kepada kita atau sebaliknya.

Dalam menghadapi sesuatu masalah, sama ada kecil atau besar, setiap pemimpin dan ahli UMNO mestilah sentiasa tenang serta hendaklah menghadapinya dengan perasaan dan fikiran yang terbuka dan waras. Kita hendaklah sentiasa berpandangan jauh dan cuba mengatasi setiap masalah itu dengan sikap yang rasional.

Sebagai parti utama mendukung Kerajaan Berjiwa Rakyat, UMNO mestilah sentiasa berjiwa dan bersemangat, serta sedar terhadap kewajipan dan tanggungjawabnya. Jentera pentadbiran dan sistem penerangan parti dari ibu pejabat sampailah ke cawangan-cawangan hendaklah sentiasa digerakkan bagi menyelaraskan semua kegiatan-kegiatan parti serta mewujudkan perpaduan di kalangan ahli dan rakyat.

Perjumpaan-perjumpaan bagi mendekati rakyat serta mengetahui masalah yang dihadapi oleh mereka hendaklah diadakan dari masa ke semasa. Perjumpaan seperti ini bukan sahaja untuk memberi penerangan kepada rakyat khususnya ahli-ahli parti di atas dasar dan tindakan Kerajaan, tetapi juga untuk mendapat maklumat balas atau "feed-back" dan reaksi dari rakyat terhadap sesuatu dasar dan tindakan Kerajaan. Dengan jalan ini, maka dapatlah pemimpin UMNO mengetahui dan mendekati masalah-masalah semasa, yang dihadapi oleh rakyat serta mencari jalan bagi menyelesaikannya dengan kadar yang lebih cepat dan segera.

KONVENSYEN

Dalam Perhimpunan Agung Khas, di antara pindaan kepada Perlembagaan UMNO yang dicadangkan ialah bagi UMNO Perhubungan di setiap negeri mengadakan Konvensyen Tahunan. Dalam konvensyen ini pemimpin-pemimpin parti dari seluruh bahagian dalam sesebuah negeri itu, dapatlah membincangkan berbagai masalah yang timbul di dalam negeri yang berkenaan. Masalah-masalah politik, ekonomi dan sosial yang khusus bagi sesebuah negeri, dapatlah dibincangkan dengan lebih mendalam dan keputusan-keputusannya dijadikan asas tindakan oleh Kerajaan Negeri. Konvensyen seperti ini adalah penting supaya masalah-masalah di peringkat negeri diselesaikan segera di peringkat yang berkenaan.

Kemajuan negara pada keseluruhannya adalah bergantung kepada keupayaan dan kemampuan negeri-negeri mencapai matlamat yang telah ditetapkan. Konvensyen seperti ini amatlah berfaedah bagi membolehkan rakyat dan ahli-ahli parti menyuarakan sedikit sebanyak hasrat dan kesulitan mereka serta melahirkan pandangan dan teguran terhadap jentera pentadbiran dan dasar kerajaan di peringkat negeri. Dengan jalan ini maka dapatlah pihak yang bertanggungjawab di atas kesempurnaan dan kelicinan pentadbiran Kerajaan dan pelaksanaan rancangan pembangunan di peringkat negeri, bertindak mengikut garis panduan yang lebih munasabah dan berkesan. Melalui konvensyen-konvensyen seperti ini juga dapatlah kita memperkukuh hubungan dengan pucuk pimpinan di negeri-negeri dan dengan itu memberi kepercayaan dan keyakinan yang lebih kepada pucuk pimpinan negeri bagi melaksanakan tugas dan tanggungjawab mereka.

SEMANGAT BERMESYUARAH

Perpaduan dan persefahaman di kalangan parti-parti anggota Barisan Nasional amatlah penting bagi mewujudkan kestabilan politik tanahair. Sejak tahun-tahun lima-puluhan, semasa kita sedang giat memperjuangkan kemerdekaan, semangat bermesyuarah di antara pemimpin dan rakyat berbilang kaum di negara, telah menjadi amalan kita. Sistem runding-merunding juga diamalkan oleh parti-parti dalam Perikatan dan seterusnya di masa ini di kalangan parti anggota Barisan Nasional.

Tujuan utama Barisan Nasional diwujudkan ialah untuk mengurangkan perselisihan dan persaingan dalam kegiatan-kegiatan politik supaya perhatian sepenuhnya dapat ditumpukan terhadap pelaksanaan projek dan rancangan pembangunan. Sejak ditubuhkan lima tahun yang lalu, Barisan Nasional telah dapat mengukuhkan lagi perpaduan rakyat berbilang kaum di negara ini. Melalui sistem bermesyuarah dan bermuafakat serta amalan mematuhi persetujuan dan keputusan ramai, kerjasama dan persefahaman di kalangan pemimpin dan ahli parti-parti anggota Barisan Nasional, telah dapat dieratkan lagi.

Sewajarnya semangat dan amalan baik ini disubur dan ditingkatkan lagi bukan sahaja di peringkat pusat bahkan di peringkat-peringkat Bahagian dan Cawangan. Sebagai teras parti yang mendukung Kerajaan, UMNO hendaklah menjalankan daya usaha utama dalam mengeratkan lagi hubungan dan persefahaman di kalangan parti anggota Barisan Nasional di semua peringkat. Dengan jalan ini kemajuan yang lebih tinggi dalam semua bidang akan dapat dicapai.

PENDATANG HARAM

Perhimpunan Agung UMNO pada tahun ini diadakan pada masa dan ketika seluruh dunia sedang sibuk menyuara dan membincangkan mengenai penghijrahan beramai-ramai orang-orang Vietnam dari negaranya. Kebanjiran pendatang-pendatang haram ke tanahair kita telah mengakibatkan masalah-masalah politik dan sosio-ekonomi yang serius kepada Malaysia.

Tindakan tegas kita untuk mencegah kemasukan berlanjutan orang-orang pelarian dari Vietnam ini telah menarik perhatian seluruh dunia di akhir-akhir ini. Isi kandungan jawapan saya kepada telegram Setiausaha Agung Pertubuhan Bangsa-Bangsa Bersatu, menggariskan dasar baru kerajaan terhadap pendatang-pendatang haram Vietnam dan orang-orang pelarian yang masuk ke perairan kita. Sikap tegas kita ini hendaklah disifatkan sebagai amaran kepada orang-orang pelarian Vietnam yang hendak cari perlindungan.

Langkah tegas kita ini juga hendaklah disifatkan sebagai notis kita kepada kerajaan-kerajaan negara asing yang telah berjanji dan memberi pengakuan untuk menerima pendatang-pendatang haram ini untuk bermastautin di negara-negara mereka. Mereka hendaklah segera mengambil orang-orang pelarian ini.

Kita tidak lagi sanggup dibebankan dengan ramai lagi pendatang-pendatang haram Vietnam. Bagi meringankan beban ini Malaysia bersama-sama dengan negara-negara ASEAN yang lain akan meminta Kerajaan Amerika Syarikat dan negara-negara lain yang sedia menempatkan

orang-orang pelarian Vietnam supaya mengadakan pusat-pusat penapisan di negara masing-masing. Malaysia bersama-sama dengan negara-negara ASEAN akan terus menggesa negara-negara maju supaya mempercepat dan meningkatkan lagi program pemindahan orang-orang pelarian Vietnam ini.

Masalah pendatang-pendatang haram ini memang tidak boleh diselesaikan oleh Malaysia sahaja. Ia memerlukan penyelesaian di peringkat ASEAN dan seterusnya di peringkat antarabangsa. Kita telah dapat menarik perhatian dunia luar terhadap masalah ini di Persidangan Geneva pada bulan Disember tahun lalu dan di Perjumpaan Jakarta dalam bulan Mei lalu. Menteri-Menteri Luar ASEAN telah sekali lagi mengadakan mesyuaratnya lebih kurang seminggu lalu di Bali. ASEAN telah menjelaskan pendiriannya kepada Amerika Syarikat, Jepun, Australia, New Zealand dan negara-negara E.E.C. Persidangan antarabangsa mengenai masalah ini akan diadakan di Geneva pada 20hb. dan 21hb. Julai ini. Malaysia akan menghadiri persidangan ini bagi menegaskan pendirian dan sikap kita serta mendesak persidangan ini menyusun satu program tindakan bagi menyelesaikan masalah ini dengan segera.

Walau bagaimanapun, Malaysia akan terus mengambil daya usaha utama bersama-sama dengan negara-negara anggota ASEAN mendesak Kerajaan Vietnam mengaturkan dengan UNHCR pemergian teratur rakyatnya yang ingin meninggalkan negara itu dan menerima balik mereka yang telah keluar dengan tidak melalui saluran yang ditentukan itu.

Masalah-masalah yang kita hadapi sekarang ini, merupakan satu cabaran kepada kita semua dan perlu kita hadapi tanpa kehilangan kewarasan fikiran. Kita akan

membahaskan satu usul mengenai pendatang haram dalam Perhimpunan Agung ini.

KETAHANAN

Sekalipun masalah pendatang haram telah menambahkan beban dan tanggungjawab angkatan tentera dan pasukan polis kita, tetapi ia tidak menjejaskan keselamatan negara, pada keseluruhannya. Pasukan keselamatan telah berjaya mematahkan kegiatan-kegiatan pengganas komunis. Kejayaan ini adalah hasil dari ketabahan dan dedikasi perajurit-perajurit kita serta sokongan yang diberikan oleh rakyat. Kerjasama yang erat daripada negara-negara jiran kita iaitu Thailand dan Indonesia amatlah berkesan dalam mengawal dan mengatasi ancaman musuh ini.

Perbuatan memecah patung-patung berhala dan kuil-kuil oleh segolongan kecil masyarakat kita, telah menimbulkan kebimbangan di kalangan rakyat yang berkenaan. Kerajaan memandang berat terhadap perbuatan yang tidak bertanggungjawab ini kerana ia boleh menjejaskan keselamatan negara.

Kerajaan sentiasa memberi keutamaan yang tinggi dalam masalah-masalah yang melibatkan keselamatan dan ketenteraman, lebih-lebih lagi perkara-perkara yang boleh mengancam keselamatan negara. Langkah kerajaan hendak membenteraskan kegiatan anasir-anasir anti-nasional, penyeludupan, penyalahgunaan dadah serta menangkap dan mengenakan hukuman-hukuman yang berat kepada pengedar-pengedar dadah, adalah terbukti dari tindakan dan gerakan yang dijalankannya dari masa ke semasa. Kerajaan tetap bertindak tegas bagi

mewujudkan dan seterusnya mengekalkan keamanan dan keharmonian kaum.

Keselamatan negara bergantung kepada ketahanan rakyat. Tugas dan kewajipan mempertahankan maruah, kemerdekaan dan kedaulatan negara bukanlah menjadi tanggungjawab anggota pasukan keselamatan semata-mata. Tanggungjawab ini hendaklah dipikul bersama oleh rakyat jelata. Penyertaan rakyat dalam pertahanan negara dapat membantu angkatan tentera dan pasukan polis mengekalkan keamanan dan ketenteraman. Kerajaan telah pun menubuhkan beberapa rancangan dan pertubuhan di mana rakyat dapat memberi sumbangan mereka terhadap pertahanan negara. Rukun Tetangga, Angkatan Relawan, Tentera Wataniah adalah di antara beberapa skim dan pasukan yang telah diwujudkan.

Dalam hubungan ini, saya sukalah mengambil kesempatan di Perhimpunan Agung ini mengucapkan terima kasih dan penghargaan kepada pasukan keselamatan kita yang telah berkhidmat dengan penuh semangat dedikasi dan keberanian. Persidangan ini juga merakamkan ucapan terima kasih dan penghargaan kepada Kerajaan-Kerajaan Thailand dan Indonesia di atas kerjasama mereka dalam gerakan-gerakan bersama pasukan keselamatan di kawasan sempadan dan perbatasan.

HARMONI PERINDUSTRIAN

Memang tidak boleh dinafikan bahawa kestabilan politik dan keselamatan adalah penting bagi mencapai kemajuan ekonomi. Perkembangan pesat ekonomi negara

kita telah mewujudkan peluang-peluang pekerjaan bagi rakyat Malaysia yang menganggur dan separuh menganggur. Secara langsung mereka telah dapat menikmati kehidupan yang lebih baik. Walau bagaimanapun, masih banyak lagi peluang pekerjaan yang perlu diwujudkan. Kerajaan telah pun meningkatkan usahanya bagi menarik pelaburan, dari luar dan dalam negeri, serta menggalakkan perkembangan segala bidang kegiatan ekonomi negara.

Di samping berusaha mewujudkan peluang-peluang pekerjaan yang baru, kerajaan sentiasa memberi perhatian sepenuhnya kepada kepentingan masyarakat pekerja. Kerajaan mengawal kepentingan mereka supaya mereka bebas dari dieksploitasikan oleh mana-mana pihak. Keadaan ini telah dapat dihasilkan dengan pemeliharaan hubungan yang baik di antara majikan dan pekerja. Kedua-dua pihak telah mengamalkan sikap hormat saling menghormati sambil menyelesaikan sebarang masalah itu melalui perundingan.

Sikap hormat saling menghormati serta proses perundingan ini telah menjadi sebatian dengan sistem cara hidup rakyat Malaysia. Dengan yang demikian, saya tidak nampak sebarang sebab mengapa setengah-setengah pemimpin masyarakat pekerja ingin pula meniru dan mengamalkan cara-cara kesatuan sekerja Barat bertindak bagi menyelesaikan masalah mereka. Amalan Barat yang berasaskan kepada pengalaman dan sejarah mereka, tidaklah sesuai dipraktikkan di tanahair kita.

Memang tidak boleh dinafikan bahawa keadaan sosio-ekonomi negara kita berlainan dengan keadaan di negara-

negara Barat. Kepentingan dan matlamat negara kita berlainan dan kadangkala bertentangan dengan kepentingan dan matlamat mereka. Umpamanya, di dalam bidang perdagangan antarabangsa, kita sedang berusaha bagi melepaskan negara kita daripada kongkongan sistem lama perdagangan antarabangsa ciptaan negara-negara Barat. Malangnya, usaha kerajaan ini dihalang oleh sikap perlindungan negara-negara Barat yang dihasilkan oleh desakan dan kepentingan pekerja-pekerja negara Barat.

Tambahan pula, kepentingan pekerja Barat adalah bertopengkan cogankata-cogankata yang melaungkan perpaduan dan setiakawan buruh antarabangsa. Ini mudah dilakukan oleh kerana ibu pejabat gabungan sekerja antarabangsa dikuasai sepenuhnya oleh golongan pekerja negara-negara Barat. Keadaan ini telah dibuktikan dalam pertikaian MAS-AEU pada bulan Februari lalu, di mana gabungan sekerja antarabangsa ITF, telah campur tangan dalam hal-ehwal kaum sekerja tempatan, dengan tidak sedikit pun menghiraukan kedaulatan undang-undang negara kita.

Campur tangan asing di dalam sesuatu pertikaian tempatan ini telah dilakukan sambil berselindung di belakang cogankata perpaduan dan setiakawan buruh antarabangsa. Campur tangan asing, di dalam apa bentuk dan bidang sekali pun, akan menjejaskan kepentingan negara. Adalah menjadi tanggungjawab setiap rakyat yang cintakan negara ini supaya sentiasa meletakkan kepentingan negara di atas sebarang fahaman perpaduan dan setiakawan antarabangsa.

PELAJARAN KUNCI KEMAJUAN

Pelajaran adalah kunci bagi mencapai sebarang kemajuan. Tidak ada bangsa atau negara yang akan maju tanpa pelajaran. Ia merupakan asas terhadap pencapaian segala matlamat ekonomi dan sosial negara. Matlamat utama Dasar Pelajaran Kebangsaan ialah mewujudkan perpaduan yang berkekalan di kalangan rakyat berbilang kaum di negara ini. Ini telah dilaksanakan dengan jayanya sejak 23 tahun yang lalu. Sistem Pelajaran Kebangsaan yang ada sekarang ini, dengan menggunakan satu bahasa pengantar, adalah sebaik-baik cara bagi mencapai matlamat jangka panjang Dasar Pelajaran.

Sebagaimana kita sedia maklum, mengikut ketetapan yang dipersetujui oleh Jawatankuasa Razak dan Penyata Rahman Talib, bahasa Inggeris merupakan bahasa kedua, selepas bahasa Malaysia. Saya telah menghuraikan sebab-sebab mengapa kita perlu meningkatkan usaha menekankan keperluan mempelajari bahasa Inggeris di sekolah-sekolah di dalam ucapan saya ketika merasmikan perjumpaan Biro Pelajaran Bahagian-Bahagian UMNO pada 9hb. ^{JULAI} ~~JULAI~~ lalu. Kita mesti bersikap pragmatik. Kita janganlah membiarkan pandangan waras kita dikaburi oleh perasaan dan emosi. Bagi pihak kerajaan, saya memberi jaminan bahawa pengajian bahasa Inggeris tidak akan menjejaskan kedudukan dan kedaulatan Bahasa Malaysia.

Adalah juga menjadi hasrat kerajaan untuk membanyakkan lagi peluang dan kemudahan pelajaran supaya semua yang layak boleh melanjutkan pengajian ke peringkat yang lebih tinggi. Kemudahan pelajaran di pusat-pusat pelajaran tinggi dan universiti-universiti mestilah tidak menjadi kemampuan orang-orang dari keluarga

yang berada sahaja. Pendidikan universiti semestinya dapat dinikmati oleh sesiapa sahaja yang mempunyai kelayakan. Kerajaan sedang mengkaji satu sistem pengambilan pelajar yang baru bagi menambahkan peluang kepada golongan pelajar dari luar bandar serta dari keluarga yang kurang berada untuk menikmati pelajaran di peringkat yang tinggi ini.

Adalah menjadi matlamat Kerajaan agar pengambilan bilangan pelajar ke universiti-universiti tempatan mencerminkan komposisi keturunan kaum di negara kita. Matlamat ini akan dicapai selaras dengan proses membesarkan universiti-universiti tempatan. Walau bagaimanapun, usaha Kerajaan di bawah Dasar Ekonomi Baru bagi mengimbangkan bilangan bumiputera dalam jurusan-jurusan di mana terdapat kekurangan pelajar bumiputera dan bumiputera yang terlatih, akan diteruskan. Usaha ini sepatutnyalah mengambil kira kemudahan yang terdapat kepada kaum pelajar bumiputera pada masa-masa lepas serta kemudahan pelajaran tinggi pada keseluruhannya, sama ada di dalam atau di luar negeri.

Adalah nyata bahawa Kerajaan telah, sedang dan akan menyediakan berbagai kemudahan di dalam bidang pelajaran bagi kaum bumiputera, sama ada dari segi tempat-tempat di universiti ataupun dermasiswa dan biasiswa. Kesemuanya adalah bertujuan bagi menambah kemampuan kaum bumiputera mengimbangkan kedudukannya dengan kaum-kaum lain di negara ini. Dengan jalan ini, maka dapatlah kaum bumiputera yang telah ketinggalan dalam bidang ini, bersaing dengan kaum-kaum lain. Dalam hubungan ini, generasi muda kita mestilah sentiasa bersedia menyambut peluang-peluang ini kerana kepada merekalah terletaknya harapan masyarakat dan negara. Pelajar-pelajar hendaklah menumpukan sepenuh masa terhadap pengajian mereka.

Jauhkanlah diri dari terlibat dalam kegiatan yang boleh menghalang kemajuan pelajaran. Gejala-gejala seperti ajaran agama salah, penagihan dadah dan lain-lain kegiatan boleh melemahkan kemampuan dan keupayaan mereka dalam bidang pelajaran.

DASAR PERTANIAN NEGARA

Kemajuan dan perkembangan ekonomi negara, pada keseluruhannya, bergantung kepada sektor pertanian yang mengandungi bilangan rakyat miskin yang terbesar seperti petani-petani dan nelayan-nelayan. Kerajaan berhasrat hendak memperbaiki kedudukan sosio-ekonomi mereka melalui usaha-usaha mempelbagaikan punca-punca pendapatan serta meningkatkan pendapatan petani dan nelayan, di samping menjamin pengeluaran bahan-bahan makanan yang cukup untuk keperluan negara dan eksport.

Bagi mencapai hasrat dan cita-cita ini, Kerajaan akan terus melaksanakan program bagi mewujudkan golongan petani yang berorientasikan perdagangan dan perindustrian; mengadakan perkhidmatan perkembangan yang luas dan cekap supaya petani-petani dapat menambahkan pengeluaran mereka dan meninggikan mutunya; meluaskan skim-skim subsidi serta kemudahan-kemudahan kredit; dan seterusnya mewujudkan kemudahan-kemudahan pemasaran yang tersusun. Lembaga Pemasaran Pertanian Persekutuan, Lembaga Padi dan Beras Negara, dan Lembaga Pertubuhan Peladang telah ditugaskan untuk menyediakan perkhidmatan-perkhidmatan ini secara "integrated marketing approach".

Pembangunan pertanian yang pesat dalam sektor kebun-kebun kecil dan pembukaan, kemajuan, penerokaan

tanah-tanah baru akan terus diusahakan. Memandangkan pentingnya sektor pertanian dalam pembangunan sosio-ekonomi negara, Kerajaan sedang menggubalkan satu Dasar Pertanian Negara yang meliputi strategi-strategi yang telah saya sebutkan tadi dan program-program berasaskan kepada keutamaan untuk memberi faedah secara langsung dan cepat kepada petani dan nelayan. Rancangan-rancangan jangka panjang akan menumpukan perhatian kepada pembangunan infrastruktur institusi dan perkhidmatan pertanian secara disatukan. Rancangan-rancangan ini bermatlamat untuk menambah dan memperbaiki punca-punca pendapatan petani. Dalam usahanya hendak mempercepatkan rancangan pembangunan, Kerajaan akan melaksanakan Program Gerak Tani bagi menyelaraskan dan menyalurkan perkhidmatan-perkhidmatan pertanian perlu kepada petani-petani secara integrated.

Kerajaan akan terus memajukan masyarakat luar bandar. Dalam hal ini, satu kajian telah dibuat bagi mentarafkan kampung-kampung kepada tiga kumpulan mengikut kemajuannya. Kajian ini dibuat secara berperingkat-peringkat. Peringkat pertama telah dijalankan pada tahun lalu bagi mentaraf kampung-kampung di luar Penguasa Tempatan di Semenanjung Malaysia. Kerajaan telah pun mengadakan peruntukan sebanyak \$100 juta bagi tahun 1979 dan 1980 untuk melaksanakan Rancangan Pemulihan Kampung. Rancangan ini akan meningkatkan kemajuan kampung-kampung yang masih meleset di luar bandar supaya setaraf dengan kampung-kampung yang telah maju dalam bidang infrastruktur, ekonomi, sosial dan penyertaan penduduk-penduduk dalam projek-projek Kerajaan.

Sebagai salah sebuah pertubuhan yang besar, UMNO mestilah membantu Kerajaan memulihkan kampung

kampung yang tertinggal ini. Kita patutlah menggalakkan penduduk-penduduk mengambil bahagian dalam rancangan-rancangan Kerajaan. Semangat berdikari, bekerjasama dan bergotong-royong mestilah dihidupkan semula bagi memajukan keluarga, kampung dan seterusnya negara.

AMANAHAH DAN JUJUR

Perjuangan UMNO hendaklah sentiasa berlandaskan semangat kejujuran dan keikhlasan. Sesungguhnya, amanah, kejujuran dan keikhlasan adalah sifat yang mulia dan terpuji. Ia merupakan faktor utama bagi mengukuhkan keyakinan dan kepercayaan serta asas penting bagi mencapai kemajuan dan kejayaan. Setiap rakyat, sama ada pemimpin, pengarah, pengurus, pentadbir dan para profesional mahupun seorang kakitangan yang serendah-rendahnya dalam sesebuah jabatan, institusi kewangan, syarikat atau pertubuhan, perlu mempunyai sifat-sifat penting ini. Tanpa amanah dan kejujuran, seseorang itu akan dipandang rendah oleh masyarakat sekalipun ia mempunyai kelulusan yang tinggi, bijak atau berpengalaman luas.

Sesebuah negara akan hancur dan musnah jika pemimpin-pemimpinnya tidak jujur dan tidak amanah atau korap. Banyak contoh tauladan yang telah berlaku yang boleh dijadikan panduan kepada kita. Kesan dan akibat buruk yang telah menimpa kepada Bank Rakyat disebabkan oleh sikap dan sifat tidak jujur dan tidak amanah beberapa orang pengarah, pengurus dan pegawainya, hendaklah menjadi satu pengajaran besar kepada lain-lain institusi, badan dan agensi kerajaan, termasuklah syarikat dan anak-anak syarikat yang ditubuhkan oleh Kerajaan.

Mereka yang telah diberi tanggungjawab mengendalikan dan mengawasi urusan-urusan ekonomi, pelaksanaan pembangunan dan menjaga kepentingan rakyat, hendaklah insaf di atas kesilapan, kelemahan, kepincangan dan penyelewengan yang telah dilakukan dalam Bank Rakyat itu. Kerajaan terpaksa menanggung bebannya kerana hendak menyelamatkan wang dan harta-benda kepunyaan rakyat yang miskin, yang memerlukan kepimpinan yang bijak dan jujur daripada pihak pengarah dan pengurusan.

Barang dijauhkan Allah, janganlah "Pisang berbuah dua kali". Sebagai umat Islam kita mestilah mengukuhkan taqwa dan keimanan kita supaya kita tidaklah tergamak hendak melakukan sebarang perbuatan yang salah. Jagalah maruah dan mertabat kita, maruah dan mertabat kaum kita dan bangsa kita. Janganlah kita terlalu sangat mengikut godaan hawa nafsu serta terpengaruh dengan perasaan tamak-haloba, sehingga sanggup melakukan sesuatu yang curang.

Orang-orang yang memegang jawatan tinggi dan berkuasa, memang sentiasa terdedah kepada berbagai cubaan dan dugaan. Peluang yang banyak dan kemudahan yang terbuka di hadapan mata, boleh mendorong mereka lupakan kepada tugas dan kewajipan serta berani mengenenipkan amanah rakyat yang telah dipertanggungjawabkan kepada mereka. Kita sepatutnya menjaga wang, harta dan kepentingan rakyat lebih cermat daripada duit dan harta kita sendiri. Janganlah kita sewenang-sewangnya menggunakan wang rakyat untuk faedah dan kesenangan diri kita sendiri. Sewajarnya kita niagakannya supaya ia boleh mendatangkan keuntungan yang besar atau membelanjakan wang itu untuk projek dan rancangan yang boleh membawa manfaat kepada rakyat jelata.

Kita mesti ingat bahawa wang Kerajaan adalah wang rakyat. Peruntukan atau pinjaman yang diberikan oleh Kerajaan kepada badan dan agensi ialah pada hakikatnya wang rakyat. Kita mestilah memegang amanah ini dengan baik dan selamat serta penuh kejujuran. Janganlah kita menghampa dan mengecewakan harapan rakyat. Kita mestilah bertindak sebagai Pagar Menjaga Padi; **JANGAN PAGAR MAKAN PADI.**

Saya melahirkan pandangan, teguran dan nasihat ini dengan perasaan penuh tanggungjawab, berterus-terang dan secara ikhlas. Saya juga mengingatkan bijak pandai dan golongan intelek, terutama pemimpin-pemimpin parti, baik dalam UMNO mahupun dalam lain-lain parti anggota Barisan Nasional, supaya sentiasa meletakkan kepentingan rakyat dan negara di atas lain-lain kepentingan. Kita hendaklah sentiasa berhati-hati dengan tindakan dan perbuatan kita supaya kita tidak menimbulkan sangkaan yang buruk, sehingga boleh menjejaskan keyakinan dan kepercayaan rakyat terhadap parti kita dan Kerajaan.

ROHANIAH

Saya telah menekankan sifat-sifat amanah, kejujuran dan keikhlasan, serta menyeru umat Islam supaya mengukuhkan taqwa dan keimanan. Semai dan suburkanlah semangat disiplin diri di kalangan generasi muda kita bagi menjamin masa depan negara. Didikan agama kepada anak-anak kita adalah penting sebagai benteng yang kukuh bagi menghadapi segala cabaran dan dugaan hidup di dunia. Bagi mengimbangkan persaingan

dalam kemajuan pembangunan dan kebendaan, Kerajaan juga melaksanakan rancangan-rancangan pembangunan rohaniah.

Memandangkan pentingnya didikan agama, Kerajaan telah juga mengambil langkah bagi memperbaiki sukatan pelajaran agama kepada pelajar-pelajar Islam di sekolah-sekolah. Latihan khas juga diadakan bagi guru-guru agama.

Di akhir-akhir ini memang terdapat perkembangan ajaran-ajaran sesat dengan banyaknya. Pada pandangan saya, sudah sampailah masanya bagi kita meneliti perkara ini dengan secara mendalam. Ajaran-ajaran sesat ini bukanlah hasil daripada dakwah yang keterlaluan, tetapi ialah sebenarnya dakwah-dakwah yang disebarkan oleh orang-orang yang tidak bertanggungjawab. Islam telah dijadikan sebagai kulit sahaja supaya menjadi daya penarik. Tujuan mereka adalah untuk menghampakan kegigihan pendakwah-pendakwah, alim ulama dan orang-orang yang berjuang untuk memperkembangkan agama Islam. Satu usul mengenai perkara ini akan dibahaskan nanti.

PERGOLAKAN SERANTAU

Dalam usaha mengeratkan perhubungan persahabatan dan perdagangan antarabangsa kita sentiasa mengikuti perkembangan dan pergolakan-pergolakan dunia. Beberapa peristiwa dan pergolakan di rantau Asia Tenggara ini amatlah membimbangkan. Pergolakan itu menjejaskan kestabilan rantau ini.

Selama lebih dari dua puluh tahun negara-negara di Indochina telah mengalami peperangan yang telah

menyebabkan beratus-ratus ribu nyawa manusia terkorban serta membawa penderitaan kepada penduduk-penduduknya. Apabila tamatnya peperangan di Vietnam, kita telah mengharap bahawa keamanan dan kestabilan di rantau ini dapat dipulihkan. Tetapi sebaliknya tercetus pula perselisihan di antara Vietnam dan Republik Rakyat China. Vietnam telah mengikat perjanjian dengan Soviet Russia dan berikutan dengan ini, Kerajaan Pol Pot di Kampuchea telah digulingkan oleh puak Heng Sarim dengan bantuan tentera Vietnam.

Pergolakan di rantau ini telah berlanjutan dengan tindakan China menyerang Vietnam dan menduduki sebahagian tanah kawasan Vietnam. Sungguhpun Kerajaan Republik Rakyat China telah mengundurkan tenteranya dari Vietnam, perselisihan di antara kedua-dua negara itu masih tidak reda. Kita berharap pihak-pihak yang berkenaan akan menggunakan segala kebijaksanaan dan kewarasan untuk menyelesaikan perselisihan di antara mereka.

Dalam perkara ini Malaysia telah pun menerangkan pendiriannya. Bersama-sama dengan negara-negara ASEAN yang lain, kita telah mengemukakan satu usul di Persidangan Bangsa-Bangsa Bersatu supaya kesemua tentera asing diundur keluar dari negara-negara yang terlibat dalam persengketaan. Usul ini adalah berasaskan kepada pendirian kita menolak sebarang campur tangan kuasa asing dalam urusan dalam negeri sesebuah negara. Kerajaan di Kampuchea hendaklah ditentukan oleh rakyat Kampuchea sendiri.

Pergolakan dan persengketaan ini telah dirumitkan lagi oleh perkembangan terbaru. Vietnam telah menempatkan bala tenteranya di sempadan Thailand/Kampuchea dengan alasan memburu pasukan tentera kerajaan

Kampuchea yang digulingkan. Kerajaan sedang memerhati perkembangan ini dengan rapi dan teliti supaya dapat menyusun langkah bagi menghadapi sebarang kemungkinan.

DOMINO THEORY

Perkembangan yang telah dan sedang berlaku di rantau ini telah menimbulkan semula pendapat di kalangan beberapa pihak, kemungkinan jatuhnya kerajaan di Asia Tenggara berasaskan rangkap "Domino Theory". Saya sendiri tidak percaya kepada teori ini. Selagi rakyat Malaysia masih lagi yakin dan menghargai sistem dan cara hidup aman dan bebas yang telah kita amal dan warisi sejak berzaman-zaman itu, teori ini, Insya Allah, tidak akan menjadi realiti. Rakyat telah menikmati keamanan, kebebasan dan kesejahteraan dari sistem yang kita amalkan sekarang. Sebarang percubaan hendak mengubahkannya akan ditentang secara habis-habisan oleh semua lapisan dan golongan rakyat.

Dalam pada itu adalah menjadi tanggungjawab kita semua, khasnya parti yang mendukung kerajaan, memelihara sistem yang diamalkan supaya ianya terus disokong kuat oleh rakyat. Ini hanya akan terjamin jika pemerintah, dari peringkat yang setinggi-tingginya hinggalah ke jawatan yang serendah-rendahnya, sentiasa bersikap jujur dan amanah. Mereka hendaklah mengelakkan berlakunya kepincangan dan pada setiap masa mengutamakan kepentingan rakyat.

Dalam keadaan tidak stabil yang terdapat sekarang ini, kita berasa bimbang terhadap kemungkinan kuasa-kuasa besar campur tangan dalam pertikaian yang sedang berlaku di Indochina. Laporan-laporan yang menyatakan bahawa sebuah kuasa besar telah menempatkan peralatan dan penasihat-penasihat tenteranya di Indochina, adalah

satu perkembangan yang menambahkan lagi kebimbangan kita. Kita berharap supaya kuasa-kuasa besar dapat bertindak secara lebih bertanggungjawab dengan tidak memburukkan lagi keadaan yang sudah pun keruh itu.

Satu lagi kawasan ketegangan ialah Asia Barat. Kita menyokong sebarang usaha untuk menyelesaikan segera masalah yang dihadapi oleh negara-negara di Asia Barat itu. Walau bagaimanapun usaha-usaha ini hendaklah mengambil kira hak-hak orang Palestine mewujudkan negaranya sendiri.

Dalam bidang kerjasama antarabangsa Malaysia sentiasa menitikberatkan hubungan serantau terutama kerjasama di kalangan negara-negara anggota ASEAN. Dalam menghadapi masalah bersama, negara ASEAN sentiasa bermuafakat untuk mendapatkan kata sepakat dan pendirian yang sama. Kekuatan ASEAN terbukti dari hubungan yang semakin meluas di antara ASEAN dan negara-negara maju seperti Amerika Syarikat, Jepun, Australia, New Zealand dan negara-negara E.E.C.

Sungguhpun banyak kejayaan telah dicapai oleh ASEAN, usaha perlu dilipatgandakan untuk mengukuhkan lagi perpaduan di kalangan negara anggota ASEAN. Asas yang kuat bagi mendirikan ASEAN yang lebih kukuh ialah perdagangan dan pembangunan.

Dalam masa kebelakangan ini, barang-barang eksport dari negara-negara anggota ASEAN telah disekat masuk ke negara-negara maju. Bagi mengatasi masalah ini kita perlu memperluaskan perdagangan sesama negara-negara yang sedang membangun, terutama di kalangan negara-negara ASEAN. Amalan lama perdagangan, di mana kita mengeksport bahan-bahan mentah ke negara-negara maju dan mengimport bahan keluaran perindustrian mereka, sekarang ini perlu diubah suai, sejajar dengan pem-

bangunan perindustrian di negara kita sendiri. Negara-negara maju tetap menjadi pasaran bagi sebahagian besar bahan utama negara kita dan juga menjadi sumber penting bagi kita memperolehi bahan-bahan teknologi yang sophisticated. Bagi pengeluaran perindustrian kita dan keperluan bahan-bahan yang tidak begitu sophisticated, patut juga kita mendekati dengan negara-negara membangun. Dengan cara ini, dapatlah negara-negara yang sedang membangun memperluaskan perdagangan di antaranya. Sebagai sebuah pertubuhan bagi kerjasama ekonomi dan sosial, ASEAN telah pun menjadi tumpuan melaksanakan usaha ini.

Beberapa langkah dan tindakan bersama telah pun diambil. Tetapi kejayaan yang tercapai adalah terhad, disebabkan sikap lama yang masih mengongkong kita. Sikap ini harus diubah memandangkan kepada potensi berdagang sesama kita dan tindakan oleh negara-negara maju menyekat import pengeluaran perindustrian kita.

SEMANGAT DAN SIKAP BARU

Saya telah pun menerangkan dengan serba ringkas program-program Kerajaan yang hendak dilaksanakan, memberikan pandangan dan pendapat saya dalam beberapa perkara dan menekankan tugas dan kewajipan kita bersama bagi menentukan masa depan UMNO, kaum Bumiputera dan rakyat seluruhnya, serta memastikan masa depan negara yang lebih terjamin.

Setiap ahli UMNO tentulah sedar bahawa kita sekarang berada dalam tahun ke-22 kemerdekaan negara. Oleh yang demikian gaya kepimpinan seharusnya berbeza daripada apa yang terdapat dalam tahun-tahun awal kemerdekaan dulu. Satu semangat dan sikap baru hendaklah diwujudkan

dalam usaha pembinaan negara, pembangunan dan pencapaian perpaduan nasional. Oleh kerana negara kita ini berbilang kaum, maka pembangunan fizikal semata-mata tidak mencukupi bagi menjayakan sebuah negara Malaysia yang adil dan saksama. Masalah dan beban yang dipikul oleh pemimpin-pemimpin semakin bertambah dalam usaha mereka mengisi kemerdekaan mengikut perkembangan dan kehendak sebuah negara berbilang kaum. Memandangkan perlunya kita memesatkan tenaga dalam menjalankan tugas serta meningkatkan kemajuan, maka semangat dan sikap baru adalah menjadi bertambah penting lagi.

Sebagai sebuah negara yang sedang pesat membangun, kita mempunyai berbagai masalah. Terdapat masalah di setiap peringkat iaitu daerah, negeri dan kebangsaan. Sebaik-baiknya ialah bagi masalah-masalah ini diselesaikan mengikut peringkat masing-masing. **Rakyat dan ahli-ahli UMNO mestilah mempunyai kepercayaan dan keyakinan kepada pemimpin-pemimpin di peringkat tempatan dan negeri yang telah dipilih oleh mereka sendiri. Pemimpin-pemimpin ini, wakil-wakil rakyat Parlimen dan Negeri mestilah digunakan sepenuhnya bagi menyelesaikan masalah-masalah di peringkat masing-masing.**

UTAMA KAN PEKERJAAN

Pucuk pimpinan di peringkat pusat pula menghadapi masalah-masalah nasional untuk diselesaikan. Tugas dan tanggungjawab pemimpin-pemimpin kian bertambah, terutamanya di peringkat pusat. Masalah negara dan rakyat ditumpu dan dikemukakan kepada peringkat ini. Tambahan pula, urusan Kerajaan hari ini bertambah rumit dan kompleks. Pucuk pimpinan memerlukan masa bagi menumpukan pemikiran sepenuhnya terhadap masalah-masalah ini serta memberi per-

timbangan sewajarnya sebelum membuat sesuatu keputusan. Beban urusan Kerajaan seharian yang dipikul oleh pucuk pimpinan ini menjadikan perlu bagi masa yang terhad itu digunakan dengan sepenuhnya. Kami insaf bahawa lawatan-lawatan adalah perlu bagi mengikut secara dekat kemajuan dan kejayaan projek-projek Kerajaan di peringkat daerah dan kampung. Walau bagaimanapun, lawatan-lawatan ini tidak dapat dilakukan terlalu kerap. Oleh hal yang demikian, sesuatu lawatan itu hendaklah digunakan sepenuhnya untuk mencapai tujuan yang tertentu. Lawatan-lawatan ini hendaklah disusun dan dilakukan secara "business-like". Pekerjaan dan perbincangan yang boleh memberi faedah kepada rakyat hendaklah diberi keutamaan, bukanlah sambutan secara besar-besaran yang biasanya dilakukan.

Acara dan upacara sambutan hendaklah diringkaskan bagi menjimat masa dan tenaga. Amalan ini akan juga menjimatkan perbelanjaan yang boleh digunakan untuk kepentingan rakyat. Dengan mengadakan acara sambutan yang ringkas dan sederhana, lawatan itu akan lebih berkesan. Cara ini pernah diamalkan atas arahan Allahyarham Tun Razak. Allahyarham Tun telah berkali-kali membuat lawatan secara mengejut tanpa sebarang upacara sambutan. Kesan daripada amalan ini adalah ternyata sekali. Kita mestilah mencontohi cara yang "business-like" ini.

Para Perwakilan sekalian,

Berbalik kita kepada Perhimpunan Agung ini, saya menggesa setiap perwakilan yang mengambil bahagian dalam perbahasan, supaya menggunakan masa yang terhad di hadapan kita ini, dengan cara yang sebaik-baiknya, lagi boleh memberi kesan. Pandangan dan teguran yang padat, bernas dan membina boleh dijadikan

garis panduan kepada tindakan parti dan Kerajaan di masa-masa akan datang.

Akhirnya, saya mengucapkan terima kasih serta penghargaan kepada semua pihak yang telah bersama-sama menjayakan Perhimpunan Agung UMNO Yang Ke-30 ini. Semoga Allah Subhanahu Wataala memberkati segala usaha suci kita.

Wabillahi Taufiq Walhidayah,

Wassalamu Alaikum

Warahmatullahi Wabarakatuh.

~~UCAPAN? ADHO~~

~~664 - 49/81~~



No Siri	451
No Penerimaan	79/81

~~UCAPAN: ADHO~~

~~664 - 49/81~~



No Siri	451
No Penerimaan	79/81

Diterbitkan oleh Ibu Pejabat UMNO Malaysia.

dicetak oleh Utusan Printcorp Sdn. Berhad, Kuala Lumpur.